

Christian Meivah

May - June, 2014

Lhani seh thuso

Private Circulation

Pentecost Nikho

June 8, 2014 nikho hi eiho din Pentecost nikho ahi. Jesu kitep na banga vana kona, Pathenin Lhagao Theng chu Jesu tahsan ho umpi dia ahin sollhah nikho ahi (Acts 2). Mi abang koma Lhagao Theng in pao chom thona tha apen, abang chu mi damsah theina apen chule abang kit chu christian khat ahinaa lhamon na apei.

Bible a Lhagao Theng thu dol mun tampia akisune. Houbung kipat tillai chun Lhagao Theng hin thil kidang tamtah anabole. Lhagao Theng chung changa het-a pha thil nga aume. Hiho chu :

1) *Lhagao Theng hi Pathen ahi* : Ps. 51:11, “Na angunga konin nei paidoh lou jenin, kachunga konin jong na Lhagao Theng lamang hih in.” Hiche thu hi Bathsheba kitinu achonsetpi tah jeh-a Pathen henga akisihna thudol, leng David in ana jihdoh ahi. Pathenin leng Saul ana dalhah bangin, eidalha khante tia David in anagin ahi. Hijeh a hi, ‘Na angunga konin nei paidoh lou jenin’ tia Pathen henga anatao ahi. Athu sei phudetna din, na Lhagao Theng kei-a konin lamang hih in, tin ana seibe kit tan ahi. Hijeh hin, Lhagao

Theng hi Pathen ahi. Pathenin abol nom ho chu Lhagao hin abol ahi.

2) *Lhagao Theng hi eikimoh peh u ahi* : “Peter in ajah uva, ‘nalung hei unlang, chonset suhbeinan Jesu Christa minin nabon chauvin Baptise chang cheh un, chule Lhagao Theng kipea hi nachan diu ahi’” ati (Acts: 2:38). Jesu thina kona athodoh jou va, Pentecost nikhoa, Peter in mipi ho koma Baptise chan jouva thilni soh ding ahi, anatina ahi. Khat chu ahile chonset ngaidamna chang ding, chule anina chu Lhagao Theng kimohpeh hi thilpeh (gift) dana chang ding ahi.

3) *Lhagao Theng hi goulona het na ahi* : “Ama natahsan uva thutep sa Lhagao Thenga mohor kinama nahitauve Lhagao Theng chu igou dingu khamgahna ahi” (Eph. 1: 13-14). Dukana lekhabu khat naki choh jou tengle achunga namin naki sut jie. Idia hitia chu nabol ham ? Hichen aseina chu, lekhabu chu nanga ahitai, tina ahi. Pathenin jong ama tahsan christian khat chu, amaa ahitai ti hetna a Lhagao Thenga mohor anamkhum ahi. Pathenin lekha pheng leh lekha tui amangpoi, Lhagao Theng joh chu apeh-a, Lhagao Theng neichan chu amaa hia ahitai.

2

Mi khat hi Jesu tahsan ahi ti phot chetna chu Lhagao Theng ki pea chu ahin, Lhagao Theng chang chan chu ‘goulo’ ding ahitan, goulo kiti chu tonsot-a vana Pathen toh chengkhom ding tina ahi.

4) *Lhagao Theng in taona mang ho apanpi* : “Lhagao in eiho dingin seithei lou-in, peng pengin eitaopeh jiuve” (Rom. 8:26). Pathenin katao na asangpoi, tia gel aum jie. Ahinla Pathen lekhabun vang, christian dih tah khat atao tengle Pathenin angai peh tei-e, tin akisune. Ajeh chu, Pathen hi i-sunguva Lhagao Thenga cheng ahin, ilungu ahen, ingaichat-u ahen, ithumu ajai. Isung uva cheng Pathen Lhagao chun, itao nau jouse Pathen heng allhut ahi. Hijeh hin, tao na akiman jou tengle lungmonna aki nei jie.

5) *Lhagao Theng in ikhantou sah uve* : “Lhagao ga vang chu, ngailut, kipa, cham, lungmon, thohhat, mihepi, phat, tahsan umtah hi, lungneng, ama chang kitim, hicheng hi ahi” (Gal. 5:22-23). Christian jousen ni seh leh Jesu to bahcheh chehna thei hinkho atup-u angai-e. Atahsan mi khat hinkhoa Christa akilan ngai ahi. Thilbai vang ahipoi, ajeh chu christian tamtah in Jesu toh kilo cheh cheh na ding akigon pon, akhoh sah pon, hijeh chun atahsanna adailha jie.

Paul in Gal. 5:22-23 a asei hi kihabola jui aphai. Hiche hin lha-gaova machalna eipeh diu ahi. Lhagao thudol Bible a akisune, simin.

Pen, nakipe ding ahi

Pathen tahsan til gollhang khat nikhat hou-ina akai pet in, nupi khat hi lunggim tah-a tou ana mui. Amanu chu agel gel pet chun alung sunga, “Hichenu khu sum pen” tia kisei ogin khat anajai. Amanu chu ahetsa hilou, akoma thu gasei ding ngap lou pasal anahi. Ahinla alunga hichenu chu acheng jinge. Asakhao amaile dangka chengnga bou anei in ahi. Hiche chengnga chun amanu ipia jong apanpi jou ding ham, tin atou thip beh tai.

Ahinla alung sunga, chen sum chu gapen, kiti ogin aging jing tai. Ajo jonan adingin, amanu henga chun achen, “He-u, kahetsa nahilou vangin, nanghi chengnga kapenome” tin apetai. Numeinu chu akap jeng tai. Pasalpa chu atouna muna akile tan ahile, “Khongai tadin, keihi ka changa cheng nupi khat kahin, ahin la tunia hou-in kaitei ding kati ahin, hou-in lhunna kham bep sum kanei a kahung jeng anahin, ‘Pathen kaki nungle nading nei ngaito peh in’ tia kanatao ahi’ tin ana sei-e.

Pasalpa hin kipah tah in atouna ajontai. Hou-in kikhen in pasalpa loi hon, amapa koma cha gadon ute, tin anakou in, aman, sum kanei poi, hung ponge, atile aloipa khat chun, ken sum kanei nai, tin ana kouvin, dangka cheng som man thil ana nehsah-e. Pen chutileh naki pehbe ding ahi, kiti chu adih tai.

Mang theilou muchi

Heb. 4:12, “Pathen thu hi hing jingle natong hat jing ahi, chule hemto chemjam jouse sanga jong hemjo ahi.” Christian phatah chu hia ahiala anu le apan hou-in akai teina dia atilkhoulou chapa khat hi chihna thepnaa chule kichep golseh a thanom tah ahin, high school akai lai chun aloiten nikhat khangthah ho camp a pang din ana kouve. Atha anom pon, ahinla aloi hon ahakou jeh chun nithum camp a chun ana pange. Kikhopna ina chu alut leh amalama dokhang chungga Trophy hoisel alentah khat akitun amui.

Apena pat hou-in kai kha loup, Bible jong simkha loup hin camp a hin Jesu thu kisei anaja ma sapene. Lamkaite chun, ‘Nini sunga Bible chang lungchina tamhet pen aumle Trophy (cup) chu peh ding’ ahin tiuve. Ama chun lamkaite koma Bible khat akithumin, nini sunga chun lunglut tah-a asim leh Bible chang 30 lungchin (memorise) abol jouve. Lungchin boltam lah-a ama asang pen ahijeh chun Trophy chu anape tauve.

Hia kon chun hou-in kaihatah, kichep golseh-a ponpan tah leh Bible simhat tah khat ahung hitai. Kum 15 jouvin America a football themho lamkai in ahung pange. Ni khat hi ahai thei tapoi, athimil tai. Ahung khah doh le heart-attack ana hi jeh chun hospital ICU a ana um

chu ahin hedoh in, atahsa a chun electric guiho ho akiphut chel chul in, ipi iti kahim, tin ana lungdonge. Hitia lungdong tah-a aum lai chun, kum 15 masanga chinpha (lungchin) ana bol Bible chang 30 ho chu aban banin akama aphongdoh in, abon chan aseidoh thei in, achaina pena, “Keiman thina phaicham lim jotpa jong leng, thilse kaging poi; ajeh chu nangman neilhonpi” (Ps.23:4) tihi aseile alungkot ahung kihongin adam heltai.

Doctor pan adamdoh ding ana tahsan lou vangin tun ama adam sel tan, tuhin hou lamkai khat ahitai. Mun tina miho henga Pathenin ama alungsetna, Bible chang in adamsah na thuho aseile in, isunga Bible thu aum poule damna ahi, tin aphonngle tai.

Thum seh-a lhinglou

Nupi khat Jesu henga ahung in, “Kachanu adampoi, nalung ahile damsah in” tin ana taove (Mt.15:21-28). Angaina monga Jesun mi alung set ahin, mi tamtah ana sudame. Kho mulou pa khat kho amusah in, sepai pa chanu adamsah in, damna deiho ana hepi jinge. Nupinu taona hi Jesun adonpon, “Israel phunga amangsa heng tailou adanga dinga kisol kahi poi” atipeh tai. Ahinla nupinu chun Jesu ajuitei tei in, atao jingin, ahileh “Numei, natahsan alene. Nalung got bang chu hita hen” tin Jesun ana sei in ahile hiche pettah chun a-ina dam lou achanu chu adam doh tai.

Nupinu hi Jesun iti ahin khohsah ham? Ajeh chu, Jesu keng bula alhuh jenga ahouva, apa chat a, athangvah jeh chu ahipene. Jesu ahou jeng phat chun, Jesun ana toh ban adalhan, amanu chu aven, ‘Na tahsan alene. Ima jouse acham kim tai. Nachanu adam tai. Ina kile tan’ tia anasol ahitai. Jesu lunglhaina chu nupinun anahouva, abohkhup pum a avahchoi-a, thil athum chu ahi.

Ihet diu chu, thumseh a ima lhingthei ahipoi, thangvahna leh hou na chule pachatna masat sah ngai ahi. “Pakai Taona” Jesun eina hilu va khun, amasa penin Pathen vah choina, thangvahna apangin, chu jouvin thumna ho apange (Mt.6: 9-10). Thangvahna hin, Pathenin na ahintoh patna ding kot ahongpan jin ahi (1 Chron. 16:8).

Pentecost nia Lhagao Theng

Pa thutep kei-a kona najah uchu ngah jingun (Acts 1:4). Pathen thu kisei lah-a hilchet hahsa pen lah a Pentecost nia Lhagao Theng ki buh lhah thu hi jong hinte (Acts 2:1-42). Ijeh inem itile, mijouse tahsan dan leh pomdan akibang poi. Vet sah nan :

Chungga konin hui hattah gin bangin, meikong bangin, alu uva achong in, Lhagao Theng adim cheh un, pao chom pao chomin thu aseiuve, tihi ahi (Acts 2:2-4). Hiche thu hi mi loikhat in, Pentecost nia ding

bou ahi tua eiho chungga ding ahi tapoi, tia tahsan a pangloi aume. Loi khat chun, tua jong eiho chungga um a, hiche nia sanga hatjo cheh-a ichan diu ahi, tia tahsan aume. Hoijoh chu dih nasa dem ! Ken jong tila chu amasapa bou hi kana tahsan ahi. Ahinla ka hung penthah a Lhagao kahung chan phat in, anina hi ka chungga ahung tai. Alon hatpen, pao hetlou thopen, lamma chim theilou kahung hi. Lhagao thu kaha sei-a, miho henga napen tah lou ule van gam nalhun lou diu ahi, tia kahasei laitah in, B.D. sim chai Pastor pa khat in hitin eina hile. “Sopi, nathusei le naumdan chu, Bible to akitoh poi. Bible in tahsan in chutile nasochat dingu ahi, ati. Tahsan bou huhhingna ahi, hitobanga thuhil dihluo ho jala, United Pentecostal Church (UPC) van mi kahi tiho leh pol dang dang hungsolo ahitai. Hijeh chun, Bible to kitoh lou thu nasei jiu jeh-a, kasei ahi” tin eihoise tan anahi.

Kakama ima kasei lou vang in, kalung thimin, “Ohe, Pakai Jesu jong thuhil dih louva, ana sei-u ahi” tin kana gele. Jesun, nanghon Pathen lekhabu nasim un nahol toh jiuvin, asunga chu tonsot hinna uma na ngai to jeh un, hinna neina din kaheng a nahung nom pouve, ati (Jn.5: 39). Chuin keiman, “Pu Pastor, tua kasei hi Bible College a simdoh thei ahipoi. Chungga kona kipe bou ahi, koima bolthu thei hilou, lekha jema simdoh thei hilou, Lhagao natoh ahi. Pakai Jesun huikhu hoi-a hung kon ham,

hoi-a che ding ham, nahet lou bang chu Lhagao natoh ahi, atibang a chu kenjong lekhaa kasimdoh jong hi lou, kabol thu jong hilou ahi, tin kana donbut-e. Aman jong, “Na Lhagao chanu jong akibang poi, na thusei ujong akitoh pon, hichu adih louna khat ahin, chule Lhagao natoh chu achom chom um thei lou ahi. Pathen khat, tahsan khat ahijoi, jat chom chom nabol uhi, adihlouna ahi” tin eina hile.

Chuin keiman, pu Pastor neihilna chu adihna chan um nante, ken hilchetna khat penge, ajeh chu Lhagao Theng mama a chun thilpeh chom chom aume, ti nahei. Chihna, hetna, damsahna, bolmo kidang bol na, Lhagao thu seidoh theina, kitiho 1 Cor. 12:7-10 hi henan nate chule Ephesia 4:11 ah, mi abang solchah, abang themgao, abang kipana thu pha lhangsam, abang chinghoi, kai hoi, mihilna kipe ahi, tin jong aki sei-e. Pathen Lhagao thilpeh aki bang chet poi. Atekah nan : jubel khat mi tampin, adon un achep un, akham phat un, akham danu aki bang chet poi. Abangin la asan, mi abang alung hangin, abang akisen in, abang akap-e. Ju chu thakhat ahi. Chutobang chun, Lhagao khat, tahsan khat-a konin mihem tehi thil peh jat chom chom ahangun ahi. Solchah Paul in, Christa lhagao neilou chu Christa ahipoi, ati jeh a, ama sei sei kasei ahideh poi, ka mu kahet chu seilou thei kahi poi, kei jong Lhagao thu seidoh theina

eikipe ahi banga, kasei ahi. Nang jong Bible nasima mi hilttheina kipe nahile nasei tei ding hilou ham. chule Lhagao Theng natoh koiham ahil chen thei ding, aheto-a aseidoh thei koi umintem, Pathenin eipeh kham kham kasei ji ahi. Jesun Nicodemus henga chungu kona nathah pen kit diu ahi, ati mana kasei ahideh poi. Kathah pen mong mong phat-a bou Pakai in Nicodemus koma anasei hi adih-e, ti kahet chet ahi. Hijeh a chu penthah na louvin, koima van gam lut ponte, ati hi thingama kasei ahi. Jesun kathutep Lhagao Theng nachan diu ahi, ati chu kachan phat a thingama kasei ahijoi.

Kapu, bolthu thu ahi nati chu nahet chetna din, nangin bolthu mong mong temin, lhakhat jong bol jou ponate. Bolthu thei hilou, chule pao hetlou hi vanpao ahi kasei nga me. 1) Belshazzar baanga, *Mene, Mene, Tekel, Parsin*, kiti hi vannoi paovin ahilchet theilou jeh-a Daniel themgao in bou ahilchet anahi (Dan. 5:25).

2) Jesun, *Eli, Eli, lema sabach-thani*, anati chu Hebrew pao ahilou le Aramaic pao ahile ibola Elijah akouve, anatiu hintem ! (Mt.27:46).

3) *Talitha Cumi*, “Numei chapang thouvin” (Mk.5:41) kiti jonghi nanghon ahimosa san, Greek pao, Hebrew pao ahi tin nasei ui. Keihon paochom hinte tin katahsan ui. Paul in mihon ahettep lou vangun, Pathen thugil ho chu aseiu ahi, ati (1 Cor.

14:2). Pathen thu hi Lhagao Theng natoh ahin, Pathen thu seithem ho chu mitcho holeh mimol lekha he lou ho ahinomui. Numei chapang pou Pathenin ahin mangcha jie. Paul in miching ho jumso dia hatmo teho Pathenin alhen ahi, ati (1 Cor.1: 27). Vannoi leiset mihem chihna le thepna hi Pathenin ngolnaa aseiu ahi (1 Cor. 1:20), tiho hi ahenga kana sei-e.

Hiche sima sopite ho, Pentecost nia Pathen Lhagao eikipeu hi, kipah tah in kisanute. Jesun, Lhagao Theng taitom chu kingaidam lou ding ahi, ati (Mt.12:3, Acts 7:51, Ps. 42:1-2). Jesun, hinna twi kahi, adang chah-a kahenga hung hen, ati (Jn.7:37). Lhagao anei diu aseina ahi. Penthah na Lhagao Theng tai lou chu eikipa sah thei diu aumpoi. Pentecost nikhoa Peter in mi 3000 val apenthah sahna thahat chu Lhagao Thenga kon ahi. Pentecost nia Lhagao Theng hi nachan hitam !

(Rev.Seikholen)

Minu Nikho May, 11, 2014

2014 a Mother’s Day hi Pa then loupina dingle nute geldoh thah kitnan mangute. Mt.22:37 a, Jesun, miho henga, na Pakai na Pathen chu nalungthim pumpin, nalhagao pum pin, nahinna pumpin, lungset in, atina a hi, najipa jong chu nangma naki ngailut bangin ngailun, tihi nuten gel doh uhen. Nupiten aji, aha ahapia ajabola, akihoulimpi ji ngai ahi. Aji aha nunbol lou, taitom lou, sumil

6 lou, hiuhen. Ajipa lung holjia chule amachang lungdei seh-a kipo da nu pi, hiuhen. Anu apa ngailu hen, ahinla ajipa sangin khohsah jo dahan. Aji jenthem leh ngaidam jing nupi hihen. Pathenin jipa khat apeh jeh in, Pa then thangvah hen, chule ajipa tao peh jinghen, chutile Pathen phat thei boh chang ding ahi. Jitoh kikhen nomna, kichen theng nit nomlou, jipa lamkai jahdana, jia kona thil ngeh jingna, jipa kipana lahpeh nomna, tiho hin ajipau guhuh-u hen. Aji koma lung mon je heu hen.

Aji henga jouthu seida hen. Ngailu tah in atah tah seihen. Insung a chamna, olna umna ding hagot hen lang cham semin panghen. Lungnem hen chule thohhat hen, mijipa khat amu teng thangset, engset lungin ve hih hen. Micha phatah khat amu teng engse hih hen, velel hih hen, amaa joh kistem tup johen. Engset, thang set kiti hohi satan a kon ahijoi. Mi in, mi lou, mi thil, mi von, mi boltheina ho engset pilou velel lou, eima hinaa lungkim mi hi angai-e. Lungthim pha lou kiti hi satan a kon ahi tihi geldoh utin kisuhboh sah poute. Pathenin mipha midih chu avop jinga angai chat ho ahettep ding ahi.

Lengpa khat in, nikhat alal touna atou jouvin, a mantri ho henga “Nangho hi miching le mithem ngen nahiuvin, nakomuva kadoh nom chu, “Vannoi leiset-a tohmun lah lah-a ahahpen, ipi ahidem, hin sei temun” ahinti. Mantri ho chu akiveto cheh

7 tauvin, chomkhat athip chet jengui. Amahon agelu chu, iti kidonbut leh lengpa akipah dem, tichu anahi. Hi tia athip nungun, mantri khat chu ahung ding doh in, “Lengpa, gam vaipoh hi, natoh lah lah-a ahahpen ahi” ahintin ahile mantri ho chu akha su cheh tauve. Lengpan avet vet leh alah uva mantri khat chu, anom jep pon, ame heo anamui.

Chuin lengpan ama henga chun, “Nang chunla iti nagel ham?” tin ana dong tai. Ama chun, “Lengpa akidonbutna chu adihmo pon, ahinla gam vaipoh hi hahsa nante, amavang keidin, minu khat in acha kipah tah-a hinkho amansah hi hahsa pendin kangaitoi” ahintin ahi leh aloiho adah lap lap soh jengui. Lengpan jong ajada thimin, nathusei chu adih dan neimu doh sah lou uva ahile nalol kitan ding ahi, tin ahinsei-e.

Chuphat in, mantri chingpa chun lengpa henga, “Lengpa, minu khat leh acha khat hikoma hungleh phante” atile lengpan avela minu khat leh achapa khat ahin puilut sah tai. Mantri michingpa chun chapang henga, “Chapa, lengpa henga hin nathum nom kithumin” atile chapang chun, “Lengpa, saipi khat hikoma kadei-e” ahintin, lengpan hikoma chun saipi khat ahin kailut sah jenge. Chapangpa chun, “Lengpa, hiche saipi hi kasakhao sunga neikhum peh in, kakipoh lea kaloi ho kavet sah theina din” ati. Mantri ho chun “Hichu ahithe i poi” atiuvin, ahinla

7 chapang chun kap pumin, “Kasa khaova neikhum peh un,” ati tei tei in akapbi tapoi. Thunei vaihom hon aban bana alhep vangun ajou tapou ve. Chuin mantri achingjeppa chun alhemin, aman jong ajou tapoi. Chu phat in anu chu akou tauve. Mantri chingjeppa chun anu henga, “Nachapa hi house louhela nalhep jouding hinam, temin” ahinti. Anu-in, kichep na dia kistem saipi neo khat ahin choi in achapa henga, “Hiche saipi neo hi nasakhaova kipoh in, alen vang chu nang sakhaova lut ponte” atin apetan ahile chapangpa chu aka atangin, ahung nui in, akipah tan ahi. Lengpan jong, “Adih monge, minu khat natoh hi ahahpen vang ahi” atin akikhen tauve.

Na-inchenu nom nam ?

Khanglui lai inchen dan leh tulai a akikhe lleh tai. Khang masa lai chun, lekha sim kitiho ana umpon, minu mipa chule chate lou-va nilhum lhum in apangun, jingkah matah in avaikon un, nilhah kiothim konin in ahung lhung un, akisil lhauvin, an minun ahonin, mipan naang alemin, pochama asaan, an neh joule lupna a akiluple kichai jeng ahi.

Tulai hin chate lekha simsahtei ding, asum lut ho hol ding, igamboipi ding, tax aphatcha peh ding, houbung kina pan ding, tiho hi akibe lap in ahi. Hitia boina hin nupa kikhah jong kahvah vah in kihet khelna ahung um jitai. Insung hindan tulai

8 hin akikhel lleh tai. America te boina pipen hi nupa kikhah, chate thunun lou, kicheng lou chane, numei pasal chengkhoma danthenga jinei ding gelpha lou, adei dan dana hing kitiho hi ahitai. Insung nom kiti hi um talou ding ham tia kichatna nei atam tai. Ahinla hitobang inchen khosahna lah-a hin, nomtah-a incheng jong aum thounai, tin kasei nome. Iti hi thei-a ham ? Ajeh chu amaho insung a Pathen achenge. Pathen bei-a in sung nom semdoh hithei louhel ahi.

Tulai khanga phatlouna, boina atamjo hi insung phatlouna jeh ahipene. Chamna kipana bei insung atam jeh-a, gamsunga jong boina tam ahi. Lungthen louna insunga kon ahin, lungthena jong ina kona kijil ahi. Anu le apan kase aman leh acha te jong kase mandan themjeng ahi. Chaten Pathen vahchoina a-inuva kona ahedoh jiu ahi. Insung akhan tou loule nam jong khanglou ahijie.

Pathenin vannoi leiset asem chai chun, amasa penin insung ana seme. Japi hinkhoa ngaichat umpen chu insung hi ahi. Pathenin, “Pasal achanga aum adih theipoi, akithopi thei khat seminge” anati. Hijeh chun Pathenin Eve hi Adam din anaseme. Jinei le inchen chung changa thil gup kasei nome.

1) *Nungah gollhang te* : Khangthah ho jinei din akinem ui. Jinei na chungchang lekhabu ho asimun, TV a jong ave jiuve. Nupa kinah le nupa kikhah ho amudoh tenggel jinei lou

8 va um hinkho nomjo ngap inte, tin phabep akigel lhu jiuve. Khangthah ho alung dong gam tauve. Alung uva “Kichen lhou aum dem ? Bible dei-a jinei hithei am ? Phatea jinei lah-a kapang jouna dem ?” tiho aboipi gam tauve.

2) *Chang hinkho* : Jinei louhela achanga hing aume. Ajito kida, ajithi, ajito akidalou vanga aji dalhaa achanga cheng ho aume. Tulai hin, achanga hinkho mang atamcheh cheh tai. Achanga acha kivah jong apunge. Nungah tampi hi thepna jilbea pham, ahilou le jinei-a pham, tina hin aboi ui. Amasang khang uva mihem hinkho i-ahungti tadem !

3) *Jida* : Mi phabep ajinei in ahin la, alohling jou tapoi. Kicheng sotlou ahi tauve. Abang chu ajinei kit in, anivei, athum veina alhingin, aki cheng lhum povin, lungjin leh them mo akichanna bep ahidoh tai. Lung sunga lungkimna aholmo tauve. Aki sihlo tauve. Amaho hi iti taule phan tem ? Hoilam jon taule phan tem ?

4) *Nohphahnaa jinei* : Mi phabep in jinei nopdan, hahdan, boina ahi dan, genthei lona bep ahidan, dei dei-a kium thei lou ahidan, ahin he doh un, alungu ahop doh-e. Ana ki jinei da ngapleh, tina lunggel anei un, ahinla jitoh kikhah ding agel lhu jep pouvin, ainchenu adet jou tapoi. “Ka inचना allhinglel ipi uma ham ? Adihlou ipi um em ? Idia kana ki nepna tobanga incheng joulou kahi hitam ?” tiho agelun ahitai.

5) *Lunggel kitoh theilou* : Kum tampi kichengta, alung kitoh joulou nupa aume. Alunggel lhon kibang joulou hel, kinkelal jing lhon ahi. Mi khat chun khat thua nun ding golou ahijie. Hitia chu insung khat cheng khoma hingkhom, ahiala iti kihou toh-a pha ham, ti gel naisai lhon lou ahi. Ikichen lhon hi ina kinepna lhon bang vang ahipoi, ti nom cheh lhon ahiala chale nao jeh ham, ipi dang jeh hamin akanbeh tei tei lhon, ki khen ding golou hel ahilhona. Kitona din iki tile pham, ti ngaito deh lhon lou ahi.

6) *Inchen nom* : Mi phabep vang phaten nom satah in akichenge. Ipi chun anopsah ham ? Ipi pen chun amani inchen akipa sah ham ? Ama ni insung nopna chu, ani lhona houbung khat-a kaikhom, achate baptise chang, japi hinkhoa seiphata chang, midang toh kitoh ahi jiuve. Pathen dei-a danthenga kicheng, mi ho chun phatea inचना dia nupa tenin kinoptona lekha ajih masat lhon ngailou ahi. Ani lhona Pathen lung hol mi ahi poule kichai ahi. Hi chun hinkho lhumkei-a kichenna aso sah ji ahi. Numei pasal abangin, ki chen masangin kinoptona lekha ajih masa jin, “Ikikhen khah leh hiche hiche nang ding, hiche hiche kei ding” ti ho ajih un soi abolji lhona.

Kichen lhouva lampi thum aume. Tichu kichen lhona dia lampi thum jopmat ngai ahi. Nupa tenin Pathen atahsan ding, hi khat ahi. Aninaa, amani inchen kitupna dia

Pathenin amani dia thilgon akoisa ahi ti jong anoplhon angai-e. Thum naa, amani khat le khat akitahsan to lhon chung chona Pathen atahsan lhona, Pathena akipehlut lhon ngai ahi. Kichang ngailutna leh kiletsah na nuse angai-e. Bible in, min anu le apa adalhah-a ajia beh ding ahi, tia ase chu jui lhon hen. Christian hinan nate, hou-in kai nan nate, ahin la Pathen lunghol, alungdei bolnom nahi loule na-ina chamna, kipana umponte. Hijeh chun cross jon in, Jesu hi nahuhingpu hisah in, Pathen in na-insunga chamna leh kipana chensah tante. (Dr. Billy Graham)

Mipa Nikho June 15, 2014

Father's Day nikhoa pate ho geldoh ngai ahi. Aji acha le a-insung ngailou hel mipa akihe kha poi. Mipa'n ainsung ageldoh tei jie. Mipa beinaa minun insung pumpi apohle hahsa asalheh jin ahi, alolhin louna jong atam jie. Pa neinalai ten napau hiche nikho hin geldoh un, taopeh un, chule thilpeh jong peuvin, hichu insung damna ahi.

Vannoi gam hoa Father's Day kimanni akibang poi. Argentina a, June 3rd. week, Australia a, Sept. 1st. sunday, Brazil a, August 2nd. sunday ni ahi. Finland a, Nov. 2nd. sunday, Taiwan a, August 8 ni ahi. Italy a, Roman Catholic hon St. Joseph's Day tin amangui. Washington a, Spokane khoa June 19, 1910 nin ana kimang masa pene.

Nui-ji-ji hi Damna

* Nikhat Peter henga Jesun, “Van gama mi 500 bou hinsol lut in” ana tin ahi. Nithum jouvin, Jesun vana hung ho chu asimuva ahile mi 550 anahi. Chuin Jesun Peter henga, “Mi 500 bou hinsolin nakitia, ipi dia mi 550 nahinsol ham, hoi-a umhen ipi neuhen, nati ham” anati.

Peter in jong, “Ken mi 500 bou kahinsol ahin, mi 50 vang hi ka nun intom lama kona ahin sollut hikhat inte” tin adonbut-e.

* Khosung khat-a upaho ana kinauvin, upapu khat hin, upa khat chu abengphe ana beh leh kho lamkai hon achungthu atan diuvin meeting atou tai. Upapu khat in ‘Bible in na bengphe langkhat min abeh leh alang khat jong dopeh in atibouve’ tin ahin sei tai.

Upa naolhang khat ahung ding doh in, ‘ahile bengphe langkhat jong ahin beh jou tengle hitia chu thipbeh a um jeng ding hitam’ tin ahin donge. Chuin upa kichih sah tah khat in, ‘Bible sei dung jui-a bengphe khat abeh kit chu, Pathen thu kinit bukim ahitai, hiche jouva chu boxing ham kenga peh ham bolthei ahitai’ ahinti.

* A-in bhara lopa henga in-neipan, ‘Tulha sum neipen’ tia ana thum leh ‘Bhara sum nape jou polai inge nei khongai tadin’ anati. Inneipan, ‘Hi chu lha masaa jong nasei ahitai’ ahinti leh amapan, ‘Adih-e, ken kaseisa kakhel ngaipoi’ anati.

* Nengpi henga agolnu Lamsi in, ‘Nengpi, idia sihmi ho chu hai-a na khol haimo?’ atile Nengpi in, ‘Kanu in Rosa-gula phabep achoh-a akoi na mun kahet lou jeh-a, sihmi hohi holdoh sah-a Rosa-gula chu neh kagot ahi’ tin ana donbut-e.

* Nungah khat ajinei jouvin, ajipa te ina lut ding akicha behseh jengin Pastor pa Mobile a ahetsah leh Pastor pan, ‘1 John 4:18’ hi SMS abolin ana thot tai. Hiche hin ‘Ngailut sunga chu kichat umlou ahi, ahin ngailut chamkim chun kichat chu anodoh ji ahi’ tihi anahi. Ahinla amanun, ‘John 4:18’ joh hi anamun, hichun ‘Nang man ji nga nanei ahitai, tua nanei khu nangma ji ahipoi’ kiti joh hi anahi, ajeh chu Pastor pan ‘1 John’ sut ding khela ‘John’ seh bou ana sut ahi.

* Officer pun : “Nengboi, janhi chun kaha kagavet sah angai-e, na tin suti nana kilah in, ahinla cinema hall a kona gollhang khat toh nahung potdoh kanamui, iti dan ham ?” tia adohle Nengboi in, “Pu, amachu ahi kahasempa” tin ana seiloj jenge.

* China gama Pastor pan houbung mite henga, “Eden hona Adam le Eve chu gul in ana lheplhah ahi. Tun Adam le Eve chu China miho ana hilhon taleh itin tem ?” tin adong in ahile tehsepi khat in, “Pu, Adam le Eve eiho mi hilhon leh, theiga neh sang in, gul joh chu nedoh lhonin tin, vannoi leiset-a chonset umpon tin, mitin van gam lhung inte” anati.

Het-a Phachom

* Assam a 2013 sungin HIV positive mi 8580 akimu doh in, Kamrup hop sunga 3488 akimu doh-e. Hiche sunga hin numei 52 % ahi. Sim thalou tampi um nalai inte, atiue. Kachar district sunga HIV positive mi 1728 akimu doh tai. Manipur, Nagaland, Mizoram a jong atame, atiue.

* Guwahati khopi sunga manchah dia car bharaa lah thei atam tai. “Prime Cabs” “My Taxi” “Green Cab” kitiho hi ahiue. Dei phat-a kouthei ahi. Green Cab te bhara hi Auto Rickshaw a sangin alhom joi, first 2 Kms. Rs. 30/- bou ahi.

* Ajin adasa London a nupi khat a-uichal toh akicheng tai. Akichen nin mi 200 vel akikhome. Akum 47 lhingsa nupinu hin, ka uicha hin ei lhamonin, eikipasah in, ka ngaichat jouse asu bulhinge, ati.

* Pope Francis hi kikhopna hoa ache tengle bus a atou jin, hijeh chun anung jui cardinal ho le bishop ho jong car tou ngamlou bus a touji ahi. Pope Francis in a-office a hapta khat sungin chithi (letters) sang 6 vel amu jie. Hiho lah-a chun thumopna dingle taona ngaichatna ho atam pene. Hijeh hin aman *over-time* in na atongjie. E-mail aneipon, adei poi, hijeh chun min ama tah khut-a asut lekha thot ho adei-e. Anoi-a lam kai ho akineo sah diu leh kinopsahna hinkho anusena diuvin aseipeh jie.

* Na thisan “blood group” in itobang mi nahim ti aseidoh thei-e :
 = A (+) lamkai dan atheme.
 = A (-) natoh pontho ahi jie.
 = B (+) thohhat, midang kithopi, doile tup len nei.
 = B (-) misei-a nunglou, amading kivet keo, mi asuh gentheile nomsa
 = O (+) midang panpi nom.
 = O (-) lung neo.
 = AB (+) itobang mi ahi het hahsa
 = AB (-) miching, thil hethem.

* 12-3-2014 nia konin Guwahati khopia Purbayan Airlines, kiti khat akipan doh in, amahon Helicopter service aboluve. Ambulance, Joy flying, chartered flight, air taxi ho abolui. info@purbayan.in ahilou leh www.purbayan.in a dongun.

* Canada gamsung twikhanglen panga lhaikimvel dia kigo, tua lha 12 lhaita, U.K. a Gloucester mi Mr. Jamie McDonald tuni gei in Kms. 8,000 alhai chaitan, alhai lhai nalai in ahi. Canada kimvela lhaikol soh ding atup ahi. Lampama ageh jin, miho khotona jalin, neh le chah ding sum akimu jou jinge.

* British pasal khat in Swami Vivekanand henga, “Gentleman nahina dia phatea nel tah-a nakivona phalou ham” atile aman, “Nangho chon na danin toka sangkhol khui hon mi khat hi gentleman ahisah in, keiho chonna danin vang, chonchan nun chan pha-in mi khat gentleman asoi” tin ana donbut-e.

Christian Meivah - sim ho taona akiman peh jinge. Kum 2013 a kona sumto Rs. 100/- ahitan, asim nom jousen hin peuvin, sum napeh lhaa kona kum nakisim peh ding ahi. M.O. hinthot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Nagaland a sumto pehna thei ho :-

- 1) Mrs. Neijathem Haokip, Haokip Veng
- 2) Ms. Lhingianem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.

Nov. 2013 a konin Editor pu address akikhel tai. Jet lama kisun address hi phaten vetauvin.

Hetsah nom ho

* Guwahati khopi sunga, truck hi 64,305 ahin, bus 7113, gari neo 2,46,332, auto-rikshaw 15,611 chule gari keng ni 3,76,002 alhing tai.

* Tukum 2014 a August lhaa, nga mun thum aume. Friday 5, Saturday 5, chule Sunday 5. Hito bang hi kum 823 jou seh le asoh jie. China mihon hiche lha hi “pocketfull of money” tin aminsah jiuve.

* Germany a bongbuh khat mei in akan, ajeh aholu leh bong eh-a kona Methane Gas kitem jeh chu anahi. Hui lah-a hiche gas umlona hi gancha eh-hua kon ahipene.

Christian Meivah
 May - June, 2014

PRINTED MATTER

To :

Editor :
 Rev. M. Haokhothong,
 C/o, Tingianem Manchong
 Nichols High School, Saribari, K.C. Road,
 P. O. Rehbari -781008, Guwahati, Assam.